

昭明文選箋證

曉明大義

文選箋證卷十二

績溪胡紹煥學

貴池劉世珩校刊

班叔皮北征賦

慕公劉之遺德及行葦之不傷

惠氏棟曰漢儒皆以行葦爲公劉之詩寇榮云公劉
敦行葦世稱其仁王符云詩云敦彼行葦牛羊勿踐
履公劉厚德恩及草木牛羊六畜且猶感德趙長君
曰公劉慈仁行不履生草運車以避葭葦長君從杜
撫受學義當見韓詩也孔氏廣森云潛夫論邊議篇
云公劉仁德廣被行葦又蜀志彭萊傳體公劉之德
行勿翦之惠紹煥按寇榮王符俱出漢書趙長君見

吳越春秋又列女傳晉工妻曰君聞昔者公劉之行
乎牛羊踐履惻然爲痛之

忿戎王之淫狡

注善曰杜預左氏傳注曰狡猾也王氏念孫曰狡讀
爲姣姣亦淫也襄九年左傳弃位而姣不可謂貞杜
注曰姣淫之別名作狡者借字耳

紛吾去此舊都兮

注善曰杜預左氏傳注曰紛亂也謂心緒亂也楚辭
曰紛吾乘兮元雲按黃伯思翼騷云紛楚語賦多襲
楚辭則紛亦當爲發聲非紛亂也

遂舒節以遠逝兮

注善曰舒節將舒行其志節也按節行節也此言舒節下云弭節語意相承

劇蒙公之疲民

注善曰說文曰劇甚也今說文刀部無劇字亦無甚也之訓說文曰三字誤衍按淮南子人間訓始皇發卒五十萬使蒙公楊翁子築脩城亦稱蒙恬爲蒙公何夫子之妄說兮

五臣說作託按託字義精史記載蒙恬曰此其中不能毋絕地脈云云正其託辭故身首分而不寤

聊須臾以婆娑

注善曰須臾少時也按須臾猶逍遙也本書離騷聊

須臾以相羊王逸注須臾相羊皆遊也宋玉九辨聊
須臾以相羊正作逍遙上林賦逍遙乎襄羊同善注
又引楚辭曰何須臾而忘反須臾亦卽逍遙言遊而
妄反也楚辭守志陟玉巒兮逍遙注逍遙須臾也王
逸以須臾釋逍遙是須臾逍遙義同漢書禮樂志臨
須搖晉灼曰須搖須臾也須臾逍遙聲相轉此云逍
遙又云婆娑古人不嫌語複班彪游居賦聊卒歲以
須臾蓋取優游卒歲之意隋江總辭行李賦聊假日
以須臾亦謂假日以逍遙也

弔尉卽於朝那

注善曰史記孝文紀曰匈奴謀入邊爲寇攻朝那塞

殺北地都尉卬徐廣曰姓孫漢書安定郡有朝那縣
姚察曰卬姓段旁證云六臣本及漢書卬並作卬是
也漢書孝文功臣表餅侯孫單父卬以北地都尉匈
奴入力戰死事子侯十四年三月丁巳封與北正合
然則姓孫爲是

涉積雪之皚皚

注善曰說文曰皚皚霜雪白之貌按白字誤衍方言
皚皚堅也雪堅謂之皚猶土堅謂之塏甲堅謂之鎧
字亦作澄楚辭霜雪兮澄澄王逸注積聚貌廣雅催
澄霜雪也今本說文作霜雪之白也白疑皚字之譌
後漢書張衡傳行積水之皚皚兮語意正與此同章

懷注皚皚霜雪之貌得古義矣

嗟久失其平度

按嗟當爲羌字之誤也羌發語辭此因羌俗作哋因誤爲嗟耳

曹大家東征賦

惟永初之有七兮

注善曰東觀漢紀曰和帝年號永初按攷漢書永初安帝年號和帝是永元二者必有一誤

諒不登櫟而桮蠡兮

注善曰禮記曰夏則居橧巢六臣本作巢按依注則善本亦作巢禮運釋文櫟本亦作巢櫟巢字同

看成皋之旋門

注善曰薛綜西京賦注曰東有旋門在成皋西南十數里成皋縣今虎牢是也今水經河水注河水又東徑旋門坡北今成皋西大阪也升涉此阪而東趣成皋引此賦云云是旋門在成皋西而成皋在旋門東故西京賦曰東門于旋

訖于今而稱云

注善曰論語曰民到于今稱之稱或爲祠翟氏灝四書攷異云東征賦注引論語稱或爲祠紹煥按考異誤此賦文稱字或作祠耳非論語異文也

民亦尙其邱墳

水經濟水注引尙作饗按尙古亦作嚮水經注作饗
疑嚮字之誤善無注知本作尙不作饗銑注人猶慕
其德正作尙解

精誠通於明神

五臣本作神明按五臣本誤也此作明神與仁人信
爲韻

潘安仁西征賦

聖知弗能豫

注善曰班固覽海賦曰運之脩短不豫期也旁證云
藝文類聚海水篇引覽海賦作班叔皮而無此八字
豈類聚所引未全歟本書海賦注引亦作班彪疑此

作班固誤也

天子寢於諒闇

注善曰禮記曰高宗諒闇按喪服四制注諒古作梁
闇讀如鶉鷩之鷩謂廬也廬有梁者所謂柱簷尙書
說命無逸作亮陰論語作諒陰諒與亮古字通並梁
之假闇陰音義同今作庵廣雅廬庵也釋名草圓屋
曰庵庵奄也所以自覆奄也後漢書皇甫規傳親入
菴廬巡視將士作菴蓋庵之俗庵取奄覆之義凡奄
覆皆曰庵庵闇古今字故菴藹亦作闇藹庵又謂之
磨廡廣韻磨廡草庵也通俗文云屋平曰磨廡磨廡
卽廬之合聲太平御覽引魏略云李勝爲河南尹廳

事○前○磨○麻○壞○令○人○治○之○磨○麻○卽○屠○蘇○也

寮位儻其隆替

注善曰說文曰儻敗壞之貌今說文儻相敗也此疑有誤本書寡婦賦注引說文曰儻敗也脫相字按以儻爲敗則隆當讀爲降墨子書降字皆作隆書大傳隆谷注隆讀厯降之降是其證言寮位敗其隆替正與下名節濯以隳落語意合

若隆替則儻當讀如隳謂累見隆替

過街郵

注善曰酈善長水經注曰梓澤西有一原古舊亭處卽街郵也按舊當晉字之誤今水經穀水注作晉漢書地理志穀城瀍水出晉亭是也

秣馬皋門

注善曰左氏傳曰秣馬厲兵毛萇詩傳曰秣粟也按水經穀水注引此作駐馬疑誤

憂天保之未定

注善曰史記呂王曰我未定天保何暇寐也按據此因悟小雅天保定爾句當讀天保二字連文保猶道天保卽天道廣韻寶道也保與寶古字通王氏疏證云論語陽貨篇懷其寶皇侃疏寶猶道也寶與道同義故書傳多並舉禮運天不愛其道地不愛其寶呂覽知度篇以不知爲道以奈何爲寶太元元衝辟君道也馴臣保也

惟泰山其猶危

注善曰言武王滅商雖有泰山之固尚以爲危郭璞爾雅注曰惟發語辭按惟當讀爲雖善云雖有泰山之危正合語意雖字古多作唯或作惟

見王氏引之釋詞

賴先哲以長懋

注善曰左傳韓厥曰夫豈無僻王賴前哲以免也漢書策詔曰夏以長懋說文曰懋盛也顏師古匡謬正俗云潘安仁西征賦賴前哲以長懋懋訓勉勵之勉既改左氏本文於義未爲允愜按安仁改勉爲懋特借以協韻耳其義則當爲盛善引漢書策詔云是也後漢書章帝紀贊宏此長懋並爲賦文所引

晉演義以獻說

注善曰小雅曰演廣遠也按注引小雅遠字疑衍本書西都賦畱侯演成漢書外戚傳推演聖德皆謂推廣之意易繫辭鄭云衍演也釋文引王蜀並云衍廣也揚雄傳辭之衍者注衍旁廣也演衍古皆訓爲廣不訓爲遠今本小爾雅亦有遠字當是後人據此注誤增七啟注引小雅無遠字可證

吞景悼以迄丐

旁證云水經洛水注引崔浩注西京賦定當爲□今賦文無定字當云丐當爲敬景悼皆舉證不應丐獨

稱名

澡孝水而濯纓

注善曰澡水經注作濟按今水經穀水注仍引作澡
蓋校書者依此賦改也澡與濯義複作濟爲是隸書
齊字多作𠂔因譌而爲澡

亭有千秋之號

按水經穀水注穀水又東徑千秋亭南其亭累石爲
垣世謂之千秋城潘岳西征賦亭有千秋之號謂是
亭也旁證云太平寰宇記五千秋亭在澠池縣東三
十里潘岳喪子處

眄山川以懷古

注善曰東都賦曰慨長思以懷古按東都賦今無此

句疑有誤

殆肆叔於朝市

注善曰鄭元論語注曰陳其尸曰肆翰注肆捨也言若值庸主自矜狼戾豈能捨蹇叔朝市之刑哉殆必殺之也按善引鄭注以解肆字確而殆字無注翰注亦迂曲竊謂殆幾也危也言若值庸主矜而愎諫幾危戮三帥陳之市朝

降曲峭而憐號

注善曰劉澄之地理書曰肴有純石或謂石肴旁證云據此注則曲峭或本作石肴左僖二十二年傳正義曰此道現在穀是山名俗呼爲土穀石穀其阨道